



ル 6  
2529  
6



門名 8  
號 2529  
卷 49-6

吉林通志卷十一

沿革志中

遼為上京之東南東京之東北及女真五國等部地

上京道長春州今農安縣北

遼史地理志二長春州韶陽軍下節度本鴨子河春

獵之地興宗重熙八年置隸延慶宮兵事屬東北統

軍司統縣一長春縣本混同江地

契丹國志二十二長春路鎮撫女真室韋置黃龍府

都部署司咸州兵馬詳穩司東北路都統軍司

北邊紀事長春州亦曰長春路去女真最近邊人亦

謂之新泰州 方輿紀要十八引

遼史營衛志中春巴納 舊作納鉢滿洲語巴納地曰方也蓋指游獵之地而言

鴨子河灤東西二十里南北三十里在長春州東北

三十五里四面皆沙塢多榆柳杏林 按遼史本紀載聖宗太平四年

改鴨子河為混同江塔魯河為長春河然又屢以鴨子混同二水並稱據契丹國志則鴨子即塔魯河今

洮爾河也國志又云太宗破晉改粟未河為混同江史志傳訛未有確據

謹案滿洲源流考云遼上京臨潢府在今巴林阿

魯科爾沁札魯特等地惟長春一州濱混同江今

杜爾伯特札賚特皆州之北境則遼長春州當與

今伯都訥相近又通鑑輯覽注長春州今郭爾羅

斯地考郭爾羅斯正與伯都訥相近又光緒十五年以郭爾羅斯地為農安縣故知遼長春州惟在今農安縣無疑也

東京道通州 今長春府東北朱家城子境

遼史地理志二通州安遠軍節度本扶餘國王城渤

海號扶餘城太祖改龍州聖宗更今名保甯七年以

黃龍府叛人雅爾丕勒 原作燕頗餘黨千餘戶置升節度

統縣四通遠縣本渤海扶餘縣併布多縣置安遠縣

本渤海顯義縣併鵲川縣置歸仁縣本渤海強師縣

併新安縣置漁谷縣本渤海縣

賓州今農安縣東南瀕江處

又賓州懷化軍節度本渤海城統和十七年遷烏舍

原作兀惹戶置刺史於鴨子混同二水之間後升兵事隸

黃龍府都部署司

松漠紀聞翁舍展舊作嗚熱者國不知其始所居後為契

丹徙置黃龍府南百餘里曰賓州州近混同江即古

之粟末河也部落雜處以其族之長為千戶統之

謹按契丹國志引此文作混同江即古之粟末河

黑水也多黑水二字蓋宋以前人皆以松花江北

流者為粟末水至伯都訥折而東流者為黑龍江

合稱曰混同江據國志之文州當在伯都訥據遼

史鴨子混同二水之間當在伯都訥北據松漠紀

聞之文當在農安縣東南瀕江處準之地望紀聞

為確今從之

龍州黃龍府今長春府境

遼史地理志二龍州黃龍府本渤海扶餘府太祖平

渤海還至此崩有黃龍見更名保甯七年軍將雅爾

丕勒叛府廢開泰九年遷城於東北以宗州檀州漢

戶一千復置統州五縣三黃龍縣本渤海長平縣併

富利佐慕肅慎置遷民縣本渤海永甯縣併豐水扶

羅置永平縣渤海置

又本紀三太祖所崩行宮在扶餘城西南兩河之間  
後建昇天殿於此而以扶餘為黃龍府

謹按黃龍府本渤海扶餘府與通州為渤海扶餘  
城者似屬一處但通州所屬有扶餘等縣乃扶餘  
府舊縣黃龍府所屬之富利長平乃渤海龍州舊  
縣以史文測之蓋太祖既破龍州遷其民於扶餘  
府東北境亦設龍州如南朝僑郡故通州先名龍  
州又改扶餘府為黃龍府屬龍州故黃龍府冠以  
龍州也及遷黃龍府於東北乃初設龍州之地故

府所屬反係龍州舊縣而通州自保甯置於扶餘  
舊城故所屬皆扶餘舊縣也

元一統志賓州之西曰黃龍府即石晉出帝初安置  
之地滿洲源流考十一引

遼史營衛志下烏延原作突厥部聖宗析四布沙原作  
闕四巴拜原作戶置以鎮東北女直之境屬黃龍府

都部署司

又阿雅原作突厥部與烏延突厥同

北唐古部聖宗以唐古戶置屬黃龍府都部署司戍  
府南

益州今農安縣東

又地理志二益州觀察屬黃龍府統縣一靜遠縣

安遠州

又安遠州懷義軍刺史屬黃龍府

威州今農安縣西南

又威州武甯軍刺史屬黃龍府

清州

又清州建甯軍屬黃龍府

雍州

又雍州刺史屬黃龍府

湖州

又湖州興利軍刺史渤海置兵事隸東京統軍司統

縣一長慶縣

渤海

又渤海清化軍刺史渤海置兵事隸東京統軍司統

縣一貢珍縣渤海置

謹按湖渤二州渤海所置在今甯古塔境遼未得

其地蓋用其舊名置於黃龍府境故志文與龍州

相次其兵事則屬東京當在今長春府之西北

涑州今打牲烏拉

又涑州刺史渤海置兵事隸南女直兵馬司

率賓府今伊通州境

又率賓府刺史故率賓國地

謹按遼境僅及松花左右率賓在甯古塔東南已入渤海女真境非羈縻卽僑置耳源流考云遼率賓在涑州定理之間近之

濛州今農安縣西南

又濛州昌永軍刺史

張棣金圖經威州至小寺鋪五十里小寺至勝州五十里

雲麓漫鈔信州彰聖館七十里至勝州來德館

謹按滿洲源流考史不載沿革當爲濛戶所置按此州與黃龍府相次以宋人行程錄證之當係勝州之譌

甯江州今伯都訥城東南石頭城子

遼史地理志二甯江州混同軍觀察清甯中置初防

禦後升兵事屬東北統軍司統縣一混同縣通鑑輯覽注甯

江故城在今吉林烏喇北混同江東

謹按金之破遼首得甯江今得勝陀碑正在石頭城北是爲此州確證

祥州今長春府東北

又祥州瑞聖軍節度興宗以鐵驪戶置兵事屬黃龍府都部署司統縣一懷德縣

元一統志廢祥州在賓州西南

謹按遼時於東北邊既設都統軍司又設黃龍府都部署司又以所屬部族如圖魯卜室韋納喇諾觀等部星羅碁布築城堡運糧草撥兵甲蓋深知女直之雄鷲所以防範者周且備矣乃傳檄一呼鐵騎頓起一戰而甯江失再戰而黃龍失不一三年而咸祥五十餘城相繼並失豈始謀之不善也

女真秣馬厲兵蓄志已非一日遼顧狃於積習泄沓相仍夫法貴因時以制宜積久無不懈也識時務者為俊傑庸人罔不敗也契丹國志言遼國舊制凡關軍國大事漢人不預天祚自兩敗之後始思更張乃所用又不得其人五箇翁翁庸虜才耳天下大計屬於此曹豈有不敗者哉

遼史營衛志下遼國外十部其三曰回跋即輝發部其

九其十曰長白山部蒲盧毛朵部右不能成國附庸於遼時叛時服各有職貢猶唐人之有羈縻州也

輝發舊作回跋又作回霸部今伊通州東南

大金國志二十六自咸州東北分界入山谷至涑沫

江按涑沫即混同而志並稱中間所居之女真隸咸

州兵馬司謂之輝發按咸州在今威遠英莪門之間

有輝發河

長白山部今吉林府東南

博羅滿達勒舊作蒲部今瑋

謹按遼史博羅滿達勒部內多有烏舍民當與烏舍相近博羅滿達勒界有海蘭河又進船工則此部應在今瑋春以西長白山北海蘭河許

遼史兵衛志下遼屬國可紀者五十有九朝貢無常

有黑水部即今女真其水撈之則色微黑目為混同

江即松花江下流唐貞觀中靺鞨來朝太宗問其風

俗因言及女真之事自是中國始聞其名契丹目之

曰慮真五代時始稱女真後避契丹主宗真諱更為

女直俗訛為女質阿保機吞北方三十六蕃此其一

也阿保機慮其為患誘遷豪右數千家於遼陽而著

籍焉分其勢使不得與本國相通謂之合蘇館合蘇

館者熟女真也又曰黃頭女真自咸州東北分界入

谷口至涑沫江中間所居者以隸咸州兵馬司與其

國往來無禁謂之回霸回霸者非熟女真亦非生女

眞也自涑沫江之北甯江之東地方千餘里戶十餘萬無大君長亦無國名自推豪俠爲酋渠小者千戶大者數千戶則謂之生女眞僻處契丹東北隅

謹按黑水阻山負海風氣樸實其人勇敢善戰得之則興蓋所謂起事之地也女直來自高麗據爲已有即使遼思患預防尙恐不足以制乃舉關河天險棄之若遺豈非謀之不臧以至此乎

烏舍舊作烏惹部今三姓境

契丹國志二十二又東北至屋惹國阿里瑪舊作阿里眉國布庫哩舊作破骨魯國等國每國各一萬餘戶西南至

生女眞界西南至上京四千餘里

鐵驪國今三姓東北

契丹國志二十二正東北至鐵離國南至阿里眉等國界西南至上京五千餘里

遼金紀事海東青出於女眞東北鐵甸等五國

陷虜記距契丹東至於海有鐵甸其族野居皮帳五代

史記引

靺鞨部今甯古塔東境

契丹國志二十二又東北至靺鞨國東北至鐵離國爲界西南至上京五千餘里

謹按靺鞨當卽渤海之遺蓋自忽汗破後不復成  
國避處東偏仍其靺鞨舊號由是而女真強矣

五國部今三姓富克錦境

遼史地理志二五國部聖宗時來附命居本土以鎮  
東北境屬黃龍府都部署司

北盟彙編三五國之東接大海出海東青女真每發  
甲兵千餘人入五國界卽東海巢穴取之與五國戰  
鬪而後得

明一統志八十一五國頭城在三萬衛北一千里自  
此而東分爲五國舊傳宋徽宗葬於此

博和哩國舊作剖阿里

博諾國舊作盆奴里又作蒲奴里史又改作富珠里

鄂羅木國舊作奧里米

伊呀圖國舊作越里篤

伊呀濟國舊作越里奴史改作鐵驢又改作伊勒希

文獻通考四裔四女真外有五國曰鐵勒曰噴訥曰  
玩突曰怕忽曰咬里没皆與接境自天聖没後屬契  
丹不復入貢文獻通考

謹按魏源云三姓城在甯古塔東北五國城在焉  
卽肅慎故墟然史云自頭城以東分爲五國則非

一地可知且其名亦不一除博和哩五部外又有

威烏爾古穆延部至伊呀濟又作鐵驪然考之遼

營衛志屬國表威烏爾古鐵驪通鑑輯覽又以自

是別部不在五國部內也其地據朔方備乘圖在

混同江北烏蘇里江入混同江之西北云

伯哩

舊作婆離今烏蘇里江入又作頗里部混同江東岸

謹按唐以倪屬利稽為勃利州刺史以方隅音譯

考之當即遼之伯哩

達嚕噶

舊作達魯鞬金史作達魯部今伯古通鑑輯覽作達羅克部訥

遼史營衛志下珠展

原作達嚕噶部聖宗以達嚕噶

戶置隸北府節度使屬東北路統軍司戍境內居境

外脈

謹按金史太祖復達嚕噶部色爾袞曰與汝隣境

又率兵趨達嚕噶城次甯江州西以地勢測之當

為今伯都訥境

定安國

謹按文獻通考宋開寶三年定安國遣史上表言

本高麗舊壤渤海遺黎考高麗舊壤以唐時言之

自今朝鮮之西偏及奉天遼河以東其北境直至

松花江左右但至宋時鴨綠松花兩江以西均為

遼之郡縣大遼事跡東京至鴨綠西北峯為界長白山北為三十部

女真境吉林以北為涑州甯江州境此定安一國

當在今吉林西南磨盤山許

完顏部

謹按金史世紀一有特克新特布原作泰紳或保水完顏

部舍音原作神隱水完顏部列傳六十有五有音德爾原作雅達

蘭水完顏部六十有七有瑪奇嶺赫伯村完顏部七十

有扎蘭路完顏部塔克傳云完顏部十二則金始

代祖所居蓋海古勒完顏部其舍音水為今三音訥

般地扎蘭元作耶懶蓋即今琿春以東入海之雅

蘭河所謂耶懶率賓相去千里與今綏芬河里到

正自相符也

富察原作蒲察部

謹按金塔克傳富察部之黨七部為一世紀有富

察部又有鄂敏原作翰敏水富察部按

盛京通志額爾敏河其北為富察之野額爾敏河即鄂

敏水則富察部應在今伊通州境又考實嘉努傳

富察部人世居阿勒楚喀水則富察又當在今賓

州廳地蓋亦如完顏部之比所居非一地也

博都哩原作不尤魯部

謹按金世紀和諾克之變博都哩部富察部助之  
其地當與富察部近

費摩原作裴滿部

謹按金世紀和諾克來攻過費摩部列傳六十有五有

摩多圖原作波多吐水費摩部其部與富察隣摩多圖

音與索多庫近當在今五常廳境

瓜爾佳原作加古部

謹按金世紀有瓜爾佳部列傳六十有五又有和倫原作

胡論水瓜爾佳部和倫即今霍倫川在五常廳境

珠嘉部

珠格部

謹按金史六十五德濟呼遜皆珠嘉部貝勒雙寬  
主保皆珠格部人烏春傳涉和掄拉林水舍於珠  
格部阿勒哈村以地望診之二部當在今五常廳  
境

烏蘇展原作烏薩扎部

謹按列傳六十有五拉林水烏蘇展部當在今五常雙

城廳境

烏凌阿原作烏林荅部

謹按金世紀鄰部海蘭水烏凌阿部人尙拒阻不

服此海蘭當是甯古塔西境之海蘭也

温都部

謹按金烏春傳阿卜薩原作阿跋斯水温都部人又自

稱呼爾哈與女直豈可為親又稱拉林水以南布

克坦水以北皆吾土也其地當在甯古塔西境

烏雅部

謹按金列傳六十五和掄瓜爾佳部察遜原作蟬春水

烏雅部畏烏春強請出兵其間以為重烏春傳二

部與烏春近

温特赫原作温迪痕部

謹按金世紀有圖們水温特赫部又德克德傳和

倫水温特赫部人其地一當在琿春界一在五常

界

齊達勒原作直撚里部

沃稜原作兀勒部

謹按金博勒和傳齊達勒部嘗寇扎蘭路博勒和

討之至阿里瑪河又沃稜部掠二十五寨復討之

渡索歡河至特通額水至德里城考阿里瑪河當

即阿穆蘭河德里城當即德林石地此二部應在

三姓甯古塔間

鴻觀原作舍國部

威準原作幹准部

哲爾德原作職德部

謹按金威泰傳蘇伯水諸部不聽命使威泰至呼爾哈川召諸部惟鴻觀部不至威準部亦皆遞去遇烏塔於瑪奇嶺又通恩傳威準部侵及赫舍哩部伊喇行至蘇伯水遂攻烏庫哩部蓋此三部當在琿春敦化之交

赫舍哩原作石烈部

謹按金世紀有錫馨原作星顯水赫舍哩部屯原作陶温水

圖嚕庫原作籠古水赫舍哩部列傳六十有哈勒瑾

原作活刺渾水赫舍哩部阿爾本特克新水赫舍哩部

其地當在長白山北

烏庫哩原作古論部

謹按金世紀云圖們琿春之交烏庫哩部與蘇伯水烏庫哩蓋二部也塔克傳烏庫哩之黨十四部為一

烏遜部

烏塔部

謹按金塔克傳烏庫哩部人間誘烏遜烏塔兩部

爲亂蓋烏庫哩之黨也

達魯特部

圖吉

原作突鞠部

謹按金本紀三烏庫哩達魯特兩部來降實古納傳烏庫哩部人迪里華沙率部人降以華沙知達魯特部事達勒達知圖吉部事蓋二部亦烏庫哩之黨也

圖克坦部

謹按金塔克傳圖克坦部之黨十四部爲一阿蘇傳錫馨水赫舍哩部人嘗與圖克坦部爭長其部

當與錫馨水近

托卜古論

原作土部

謹按金世紀自白山頁赫圖們托卜古論之屬以至五國之長皆聽命又東南至於伊勒呼海蘭扎蘭托卜古倫考圖們有烏庫哩温特赫二部伊勒呼有布薩部海蘭有烏凌阿部扎蘭有完顏部獨托卜古論僅見蓋東南小部也

布薩部

謹按金史高麗傳伊勒呼嶺布薩部居高麗女直之間